

Akashvani, Sambalpur

SAMBALPURI NEWS EVENING BULLETIN

8 July 2024- 7.02 pm- 7.12 pm.

୧- ଶ୍ରୀଗୁଣ୍ଡିଚା ମନ୍ଦିର ନ ପୁଛୁଟିଲା ମାହାପୁରୁଙ୍କର ତାଳଧ୍ବଜ,
ଦର୍ପଦଳନ ଆର ନନ୍ଦିଘୋଷ ରଥ ।

- ଆଏବା କାଏଲ୍ ହେବା ଆଡ଼ପ ମଣ୍ଡପ ବିଜେ ।

୨- ପରିବେଶ୍ ବିନା ମୁନୁଷ୍ ବର୍ବାର୍ ଅସମ୍ଭବ- କହେଲେ
ରାଷ୍ଟ୍ରପତି ଦ୍ରୌପଦୀ ମୁର୍ମୁ ।

୩- ସରକାରୀ ଜମି ଦଖଲକାରୀଙ୍କୁ ହଟାବାର୍କେ ଜିଲ୍ଲାପାଲ୍ଙ୍କୁ
ନିର୍ଦ୍ଦେଶ୍ ଦେଲେ ମୁଖ୍ୟମନ୍ତ୍ରୀ ।

ଆଉର୍

୪- ରାଜ୍ୟର୍ ଦୁଇ ଅଲମ୍ବିକ୍ ପ୍ରତିଯୋଗୀଙ୍କର୍ ଲାଗି ପ୍ରୋସ୍ତାହନ୍
ଟଙ୍କା ଘୋଷ୍ଣନା କଲେ ରାଜ୍ୟ ସରକାର୍ ।

ରଥଯାତ୍ରା ଆରବନ୍ଧୁ/ ସମ୍ବଲପୁର

ଗୁଣ୍ଡିଚା ମନ୍ଦିର ପାଖେ ମାହାପୁରୁମାନଙ୍କର ତିନୁହିଁ ରଥ ଆଏଇ ପୁହୁଁଚିଲେ । ଇ ବନ୍ଧର ଗୁଣ୍ଡିଚା ଯାତ୍ରା ଦୁଇ ଦିନ ହେଇଥିବାରନ୍ତୁ ଗଲାକାଏଲ୍ ବଡ଼ଦାଣ୍ଡ ନ ଅଟକିଥିବା ତିନୁହିଁରଥକେ ଆଏଇ ସଖାଲବେଲା ସାଡ଼େ ୮ ବଜେ ଫେର ଘିଚା ଯାଇଥିଲା । ଦିନର ୨ ବାଜିକରି ୪୦ ମିନିଟ୍‌ତକ ମାହାପୁରୁମାନଙ୍କର ତିନୁହିଁ ରଥ ଶରଧାବାଲି ନ ପୁହୁଁଚିଥିଲା । ପହେଲା ବଳଭଦ୍ରଙ୍କର ତାଳଧ୍ବଜ ରଥ ତାର ଉତ୍ତରୁ ସୁଭଦ୍ରାଙ୍କର ଦର୍ପଦଳନ ଆର ଶେଷେ ମାହାପୁରୁ ଶ୍ରୀ ଜଗନ୍ନାଥଙ୍କର ନନ୍ଦିଘୋଷ ରଥକେ ଭକ୍ତମାନେ ଗୁଣ୍ଡିଚା ମନ୍ଦିର ଆଡ଼େ ଘିଚିକରି ପୁହୁଁଚେଇଥିଲେ । ଆଏଇ ସଖାଲେ ରଥ ଉତ୍ତରେ ମାହାପୁରୁମାନଙ୍କର ମଙ୍ଗଳଆଲତୀ ନୀତି ହେଇଥିଲା । ଇତାର ଉତ୍ତରୁ ଅବକାଶ ପୂଜା କରାଯାଇକରି ରଥ ଘିଚା ମୁଲ୍ ହେଇଥିଲା । ସେଆଡ଼େ ଆଏବା କାଏଲ୍ ରଥ ଉତ୍ତରେ ସନ୍ଧ୍ୟା ଆଲତୀ ନୀତି ସରବାର ଉତ୍ତରୁ ମାହାପୁରୁମାନଙ୍କର ଆଡ଼ପ ମଣ୍ଡପ ବିଜେ ନୀତି ହେବା ବଳି ଶ୍ରୀଜଗନ୍ନାଥ ମନ୍ଦିର ପ୍ରଶାସନ ତରଫୁ ସୁନ୍ଦା ମିଳିଲେ ।

ରାଷ୍ଟ୍ରପତି ଆରବନ୍ଧୁ/

ରାଷ୍ଟ୍ରପତି ଦ୍ରୌପଦୀ ମୁର୍ଖୁ ଭୁବ୍ନେଶ୍ୱର ପାଖର ହରିଡ଼ାମଦା
ଠାରେ ଥିବା ବ୍ରହ୍ମକୁମାରୀଙ୍କର ଡିଭାଇନ୍ ରିଟ୍ରିଭ୍ ସେଂଟର୍କେ
ଉଦ୍‌ଘାଟନ କରିଛନ୍ । ଇ ଅବସରେ ଉଦ୍‌ବୋଧନ୍ ଦେଇକରି ସେ
କହିଛନ୍ ଯେ, ପରିବେଶ ବିନା ମୁନୁଷ୍ ବର୍ବାର ଅସମ୍ଭବ ।
ପ୍ରକୃତି ସାଙ୍ଗେ ମିତ୍ରତା କରିକରି ପ୍ରକୃତି ଅନୁକୂଳ ଜୀବନ୍ ଯାପନ୍
କରବାର ଏକ୍ସନିର୍ ଆବଶ୍ୟକତା ଆଏ ବଲି ରାଷ୍ଟ୍ରପତି ଶ୍ରୀମତୀ
ମୁର୍ଖୁ କହିଛନ୍ । ଇ ଅବସରେ ଶ୍ରୀମତୀ ମୁର୍ଖୁ ଲାଇଫ୍ ଫର୍
ସଷ୍ଟେନିବିଲିଟି ଅଭିଯାନର ଭିଲ୍ ଶୁଭାରମ୍ଭ କରିଛନ୍ ।

ଇତାର ଆଘୋନୁ ରାଷ୍ଟ୍ରପତି ଐତିହାସିକ୍ ଉଦୟଗିରି ଗୁମ୍ଫା
ପରିଦର୍ଶନ କରିଥିଲେ । ପରିଦର୍ଶନ ସମିଆଥି ରାଷ୍ଟ୍ରପତି
ପ୍ରତ୍ନତାତ୍ତ୍ୱିକ ସର୍ବେକ୍ଷଣ ସଂସ୍ଥା - ଏଏସ୍‌ଆଇ ର
ଅଧିକାରୀମାନଙ୍କର ସାଙ୍ଗେ ଇ ପର୍ଯ୍ୟଟନସ୍ଥଳୀର ବିକାଶ
ବାବଦେ ଆଲୋଚନା କରିଥିଲେ । ସେତା ରାଷ୍ଟ୍ରପତି ଆଏକ୍
ବିଭୂତି କାନୁନ୍‌ଗୋ କଲେଜ୍ ଅଫ୍ ଆର୍ଟ୍ ଏଣ୍ଡ କ୍ରାଫ୍ଟ୍ସ୍ ଆଉ ଉତ୍କଳ
ସଂସ୍କୃତି ବିଶ୍ୱବିଦ୍ୟାଳୟ ପରିଦର୍ଶନ କରିକରି ଛାତ୍ରଛାତ୍ରୀମାନଙ୍କର
ସାଙ୍ଗେ ଭାବ ବିନିମୟ କରିଥିଲେ ।

ରାଷ୍ଟ୍ରପତି ଶ୍ରୀମତୀ ମୁର୍ଖୁ ଆଏକ୍ ସକାଳେ ପୁରୀ ସମୁଦ୍ର
ବେଳାଭୂମିଥି କେତେ ସମିଆ ରହିଥିଲେ । ଇ ସମିଆଥି ତାଙ୍କର
ଅନୁଭୂତି ପ୍ରକାଶ କରିକରି କହିଛନ୍ ଯେ, ଜଙ୍ଗଲ୍, ପାହାଡ଼,
ନଦନଦୀ ଆର୍ ସାଗରବେଳା ମିଶିକରି ଗଢ଼ି ଉଠିଥିବା ପ୍ରକୃତିର

ଆମେ ଅଂଶବିଶେଷ । ସବୁଦିନିଆ ଜୀବନ୍ର ଧାଁଦଉଡ଼ ଭିତ୍ରେ ମନୁଷ୍ୟ ପ୍ରକୃତିଠାରୁ ଦୂରେଇ ଯାଇକରି ନିଜର ସାମୟିକ ସୁଖ ଲାଗି ପ୍ରକୃତିକେ ଶୋଷଣ କରିଚାଲିଛେ ବଳି ରାଷ୍ଟ୍ରପତି କହିଛନ୍ ।

ଆଏବାକାଏଲ୍ ଓଡ଼ିଶାଗସ୍ତର ଶେଷ ଦିନେ ରାଷ୍ଟ୍ରପତି ଭୁବନେଶ୍ୱରର ଜାତୀୟ ବିଜ୍ଞାନ ଶିକ୍ଷା ଆଉ ଅନୁସନ୍ଧାନ ସଂସ୍ଥାନ- ନାଇଜରର ସମାବର୍ତ୍ତନ ଉତ୍ସବ୍ ଯୋଗ୍ ଦେବାର କାର୍ଯ୍ୟସୂଚୀ ରହିଛେ । ଇତାର ଉତ୍ରୁ ସେ ଦିଲ୍ଲୀ ଫିରିଯିବେ ବଳି ସୂଚନା ମିଳିଛେ ।

ମୁଖ୍ୟମନ୍ତ୍ରୀ- ଜମି ଜବରଦଖଲ୍ ଆରଏନ୍ୟୁ/ କଟକ୍

ରାଏଜେ ସରକାରୀ ଜମିନୁ ବେଆଇନ୍ ଦଖଲ୍ ହଟାବାର୍କେ ମୁଖ୍ୟମନ୍ତ୍ରୀ ମୋହନ୍ ଚରଣ୍ ମାଝୀ ସବୁ ଜିଲ୍ଲାପାଲମାନକୁ ନିର୍ଦ୍ଦେଶ୍ ଦେଇଛନ୍ । ଗାଁ ଆର ସହର ଇଲାକା ନୁ ବେଆଇନ୍ ଭାବେ ଦଖଲ୍ ହେଇଥିବା ସରକାରୀ ଜମିକେ ଜଲ୍ଦି ଦଖଲ୍ମୁକ୍ତ କରବାର୍ ଲାଗି ନିର୍ଦ୍ଦେଶ୍ ଦିଆଯାଇଛେ । ମୁଖ୍ୟମନ୍ତ୍ରୀ କହିଛନ୍ ଯେ, ସରକାରୀ ଜମି ମାନକେ ବିକାଶ୍ ଆଉ ଜନକଲ୍ୟାଣ୍ କାମ୍ ଲାଗି ବେଭାର୍ ହେବାର୍କେ ଅଛେ । ହେଲେ ଜବରଦଖଲ୍ ଲାଗି ବିକାଶ୍ କାମ୍ଥୁ ବାଧା ହେଉଥିବାର୍ନୁ ଇଟାକେ ହଟାବାର୍କେ ମୁଖ୍ୟମନ୍ତ୍ରୀ କହିଛନ୍ । ଜବରଦଖଲ୍ ହେବାର୍ ଉତ୍ରୁ ସରକାରୀ ଜମି

ଚାର୍ହି ଆଡୁ ଘେରବାର ସହେତେ ସାଇନ୍‌ବୋର୍ଡ୍
ଲଗାବାର ଲାଗି ଭିଲ୍ ମୁଖ୍ୟମନ୍ତ୍ରୀ ନିର୍ଦ୍ଦେଶ ଦେଇଛନ୍ ।

ଓଜେଇଇ କାଉନ୍‌ସେଲିଂ ଆର୍କାଇଭ୍/ କଟକ

ରାଏଜେ ଥିବା ସରକାରୀ ଆଉ ବେସରକାରୀ ଇଞ୍ଜିନିୟରିଂ
କଲେଜ୍ ଆଉ ଘରୋଇ ବିଶ୍ୱବିଦ୍ୟାଳୟ ବୈଷୟିକ
ପାଠ୍ୟକ୍ରମ ଥିବା ନିର୍ଦ୍ଦେଶାବଳୀ ଲାଗି ଓଜେଇଇ କାଉନ୍‌ସେଲିଂ
ମୁଲ୍ ହେଇଛେ । ଛାତ୍ରଛାତ୍ରୀମାନେ ଓଡ଼ିଶା ଯୁଗ୍ମ ପ୍ରବେଶିକା
ପରୀକ୍ଷା ଡେଇଁବାକୁ ଲାଗିଲେ କରକରି ପଞ୍ଜିକରଣ
କରବାର ସହେତେ କାଉନ୍‌ସେଲିଂ ବାବଦେ ବିସ୍ତୃତ ତଥ୍ୟ
ପାଇପାରବେ । ଭିନ୍ ଭିନ୍ ପାଠ୍ୟକ୍ରମ ଲାଗି ଅଗଷ୍ଟ ୧୭
ତାରିଖତକ୍ ୩ ଟା ଖେପେ ନିର୍ଦ୍ଦେଶା ହେବା ବଳି
ଓଜେଇଇ ତରଫୁ କୁହାଯାଇଛେ ।

ରାମଭଦ୍ରାଚାର୍ଯ୍ୟ-ଧର୍ମେନ୍ଦ୍ର ପ୍ରଧାନ ଆର୍କାଇଭ୍/ କଟକ

କେନ୍ଦ୍ର ଶିକ୍ଷାମନ୍ତ୍ରୀ ଧର୍ମେନ୍ଦ୍ର ପ୍ରଧାନ ଆସକ୍ ପୁରୀ ନ ଜଗତଗୁରୁ
ରାମାନନ୍ଦାଚାର୍ଯ୍ୟ ଶ୍ରୀସ୍ତ୍ରୀ ରାମଭଦ୍ରାଚାର୍ଯ୍ୟଙ୍କୁ ଭେଟିଛନ୍ ।
ଗୁଡ଼େ ସାମାଜିକ୍ ଗଣମାଧ୍ୟମ୍ ପୋଷ୍ଟ୍ ମନ୍ତ୍ରୀ ଶ୍ରୀ ପ୍ରଧାନ
କହିଛନ୍ ଯେ, ସ୍ତ୍ରୀ ରାମଭଦ୍ରାଚାର୍ଯ୍ୟ ଝନେ ଆଧ୍ୟାତ୍ମିକ

ଗୁରୁ ଆଉ ସମାଜ ସଂସ୍କାରକ । ତାଙ୍କର ମାର୍ଗଦର୍ଶନ ଆମର
ସମାଜ ଲାଗି ସବୁବେଳେ ବାଟ ଦେଖାଇ ବଳି ମନ୍ତ୍ରୀ ଶ୍ରୀ
ପ୍ରଧାନ କହିଛନ୍ ।

ଅଲମ୍ପିକୁ ପ୍ରୋତ୍ସାହନ ରାଶି

ଆରବନ୍ଧୁ/ କଟକ

ଆଏବା ପେରିସ୍ ଅଲମ୍ପିକୁ ଥି ଭାରତର ପ୍ରତିନିଧିତ୍ୱ କରବାରକେ
ଯୋଗ୍ୟ ହେଇଥିବା ଓଡ଼ିଶାର ଜେଉଲିନ୍ ଥ୍ରୋ ଲାଗି
କିଶୋର ଜେନା ଆର ହକି ଖେଳାଳି ଅମିତ୍ ରୋହିଦାସଙ୍କୁ
ରାଜ୍ୟ ସରକାର ପ୍ରୋତ୍ସାହନ ଟଙ୍କା ଦେବାର ଲାଗି
ଘୋଷନା କରିଛନ୍ । ମୁଖ୍ୟମନ୍ତ୍ରୀ ମୋହନ ଚରଣ ମାଝୀ
ଦୁଇଝନକର ଲାଗି ୧୫ ଲାଖ ଟଙ୍କା ଘୋଷନା କରିଛନ୍ ।
ମୁଖ୍ୟମନ୍ତ୍ରୀ କହିଛନ୍ ଯେ, ପେରିସ୍ ଅଲମ୍ପିକୁଥି ଭାର
ନେବାର ଲାଗି ଯୋଗ୍ୟ ହେଇଥିବା ଦୁହି ଖେଳାଳି ନିଜର
ଜନ୍ମମାଟି ସହେତେ ଓଡ଼ିଶାର ଗୌରବ ବଢ଼େଇଛନ୍ ।
ସେମାନଙ୍କର ଅଦ୍ୟମ ଇଚ୍ଛାଶକ୍ତି, କଠିନ ପରିଶ୍ରମ, ନିଷ୍ଠା
ଆର ଅଧ୍ୟବସାୟ ରାଜ୍ୟର ଯୁବପ୍ରତିଭା ମାନଙ୍କୁ ପ୍ରେରଣା
ଯୁଗାବା ବଳି ମୁଖ୍ୟମନ୍ତ୍ରୀ ଶ୍ରୀ ମାଝୀ କହିଛନ୍ । ସେଆଡ଼େ
ରାଜ୍ୟର ଖେଳାଳିମାନଙ୍କର ସର୍ବାଙ୍ଗୀନ ବିକାଶ ଆଉ
ସେମାନଙ୍କର ସପନକେ ସାକାର କରବାର ଲାଗି ରାଜ୍ୟ
ସରକାର ଦରକାରୀ ଭିତିଭୂମି, ଆର୍ଥିକ ସାହାଜ ଆଉ ସବୁ

ସୁବିଧା ସୁଯୋଗ୍ ଯୁଗେଇ ଦେବେ ବଳି ମୁଖ୍ୟମନ୍ତ୍ରୀ ଶ୍ରୀ
ମାଝୀ କହିଛନ୍ ।

ରକ୍ତଶିକୁଳି ରୋଗ-ନୂଆପଡ଼ା ନୂଆପଡ଼ା ସମ୍ବାଦଦାତା

ନୂଆପଡ଼ା ଜିଲ୍ଲା ନ ୧ ହଜାର ୪ ଶହ ୫୨ ଝନ୍କର ରକ୍ତଶିକୁଳି
ରୋଗ ଚିହ୍ନ ହେଇଥିବାର ଜନାପଡ଼ିଛେ । ଗଲା ଜୁନ୍
ମାସର ୧୯ ତାରିଖରୁ ଇ ମାସର ୩ ତାରିଖତକ୍ ଜିଲ୍ଲାର ୫
ଟା ବ୍ଲକ୍ ଆର ୩ ଟା ବିଜ୍ଞାପିତ ଅଂଚଲ୍ ପରିଷଦ୍ ସହେତେ
ଶହେ ୩୧ ଟା ଗ୍ରାମ୍ପଂଚାୟତ୍ ୬ ଶହ ୫୪ ଟା ଗାଁ ନ
ରକ୍ତଶିକୁଳି ରୋଗ ବାବ୍ଦେ ସଚେତନତା ସୃଷ୍ଟି
କରାଯାଇଥିଲା । ଏଛେନ୍ତକ୍ ୪୩ ହଜାର ଲୁକ୍କର
ରକ୍ତନମୁନା ପରୀକ୍ଷା କରାଯାଇଥିବା ନେଇକରି ଜିଲ୍ଲା
ଅତିରିକ୍ତ ମୁଖ୍ୟ ସ୍ବାସ୍ଥ୍ୟ ଅଧିକାରୀ ଗୁରୁପ୍ରସାଦ୍ ଜେନା
କହିଛନ୍ ।

ସମ୍ପୂର୍ଣ୍ଣତା ଅଭିଯାନ କଳାହାଣ୍ଡି ସମ୍ବାଦଦାତା

ଆକାଂକ୍ଷୀ ଜିଲ୍ଲା ଭାବେ କଳାହାଣ୍ଡି ଜିଲ୍ଲା ନ ସମ୍ପୂର୍ଣ୍ଣତା ଅଭିଯାନ
ମୁଲ୍ ହେଇଛେ । ଇ ଅବ୍ଦରେ ଆଏଜ୍ ଗୁଟେ ଗଣଦୌଡ଼
ଆୟୋଜିତ ହେଇଥିଲା । କଳାହାଣ୍ଡି ସାଂସଦ୍ ମାଳବିକା

କେଶରୀ ଦେଓ ଇ ଗଣଦୌଡ଼ର ଶୁଭାରମ୍ଭ କରିକରି
କଳାହାଣ୍ଡି ଜିଲ୍ଲାକେ ଆକାଂକ୍ଷୀ ଜିଲ୍ଲା ହିସାବେ ଗଢ଼ବାର
ଲାଗି ସମସ୍ତଙ୍କର ଉଦ୍ୟମ୍ ଆଉ ପରିଶ୍ରମ ଦରକାର ବଳି
କହିଥିଲେ । ଇ କାର୍ଯ୍ୟକ୍ରମ୍ ଲାଞ୍ଜିଗଢ଼ ବିଧାୟକ୍ ପ୍ରଦୀପ୍
ଦିଶାରି, ମା ମାଣିକେଶ୍ୱରୀ ବିଶ୍ୱବିଦ୍ୟାଳୟର କୁଳପତି
ସଞ୍ଜୟ ଶତପଥୀ, ଜିଲ୍ଲା ଯୋଜନା ଆଉ ପର୍ଯ୍ୟବେକ୍ଷଣ
ଉପନିର୍ଦ୍ଦେଶକ ଶ୍ରୀକାନ୍ତ ଦଲେଇ ପ୍ରମୁଖ ଯୋଗ୍
ଦେଇଥିଲେ । ଶେଷେ ଗଣଦୌଡ଼ର କୃତୀ ଛାତ୍ରଛାତ୍ରୀମାନଙ୍କୁ
ପୁରସ୍କାର ଦିଆଯାଇଥିଲା ।

ଦୁର୍ଘଟଣା- ମହିଳା ମୃତ ସମ୍ବଲପୁର ସମ୍ବାଦଦାତା

ସମ୍ବଲପୁର-କଟକ ୫୫ ନମ୍ବର ଜାତୀୟ ରାଜପଥର
ରେଡ଼ାଖୋଲ୍ ଥାନା ଅଧୀନଥି ଥିବା ବେତଗଡ଼ ପାଖେ
ଆଏକ୍ ସଖାଲେ ଗୁଟେ ଗାଡ଼ି ଧକ୍କାଥି ଘଟନା ଜାଗା ନ
ଝନେ ମହିଳାଙ୍କର ଜୀବନ୍ ଯାଇଛେ । ମହିଳା ଝନକ ଚାଲି
ଚାଲି ଯାଉଥିବାର ବେଳେ ଗୁଟେ ଅଜଣା ଗାଡ଼ି ଧକ୍କା
ଦେଇକରି ଫେରାର ହେଇଯାଇଥିଲା ।

ଶିକ୍ଷକ୍ ସଂଘର ଜିଲ୍ଲାସ୍ତରୀୟ ସମ୍ବର୍ଦ୍ଧନା ବରଗଡ଼
ସମ୍ବାଦଦାତା

ବରଗଡ଼ ଜିଲ୍ଲା ବ୍ଲକ୍ ଗ୍ରାଂର ଶିକ୍ଷକ ସଂଘର ଜିଲ୍ଲାସ୍ତରୀୟ ସମ୍ବର୍ଦ୍ଧନା
ଆଏକ୍ ବରଗଡ଼ ହିନ୍ଦୀ ବାଳକ ଉଚ୍ଚ ବିଦ୍ୟାଳୟ ନ
ହେଇଯାଇଛି । ବିଶ୍ୱନାଥ ବେହେରାଙ୍କର ଅଧ୍ୟକ୍ଷତାଥି
ହେଇଥିବା ସଭାଥି ବିଧାୟକ୍ ଅଶ୍ୱିନୀ ଷଡ଼ଙ୍ଗୀ, ଇରାସିସ୍
ଆଚାର୍ଯ୍ୟ, ସନତ୍ କୁମାର୍ ଗଡ଼ତିଆ ଆର୍ ନିହାର୍
ମହାନନ୍ଦଙ୍କୁ ଇ ଅବସରେ ସମ୍ବର୍ଦ୍ଧନା ଦିଆଯାଇଥିଲା ।
ଚାକିରୀ ସର୍ତ୍ତାବଳୀ ଆର୍ ପୁରୁନା ପେନ୍ସନ୍ ସମସ୍ୟା
ବାବ୍ଦେ ବିଧାୟକ୍ ମାନକର ନଜରକେ ଅନାଯାଇଥିଲା ।

ବରଗଡ଼- ରକ୍ତଦାନ ଶିବିର

ବରଗଡ଼ ସମ୍ବାଦଦାତା

ରଥଯାତ୍ରା ଅବସରେ ଆଏକ୍ ବରଗଡ଼ ବିଜେପି ଯୁବମୋର୍ଚ୍ଚା
ନଗର କମିଟି ତରଫୁ ଜାତୀୟ ରାଜପଥ ଡାକବଳା
ଠାନ୍ନେ ଗୁଡେ ରକ୍ତଦାନ ଶିବିର ହେଇଯାଇଛି । ଇ
ଶିବିରକେ ବରଗଡ଼ ବିଧାୟକ୍ ଅଶ୍ୱିନୀ ଷଡ଼ଙ୍ଗୀ ଉଦ୍ଘାଟନ୍
କରିଥିବାର୍ ବେଲେ ସମ୍ମାନିତ ଅତିଥି ଭାବେ ଭର୍ଲି
ବିଧାୟକ୍ ଇରାସିସ୍ ଆଚାର୍ଯ୍ୟ ଯୋଗ୍ ଦେଇଥିଲେ । ଇ
ଶିବିରଥି ୪୧ ଯୁନିଟ୍ ରକ୍ତ ସଂଗ୍ରହ ହେଇଥିଲା ।

ବୌଦ୍ଧ - ରଥଯାତ୍ରା

ବୌଦ୍ଧ ସମ୍ବାଦଦାତା

ବୌଦ୍ଧ ଜିଲ୍ଲାର ପାତାଳି ଶ୍ରୀକ୍ଷେତ୍ର ଠାରେ ଆଏଜ୍ ତୃତୀୟା ତିଥି ନ ଶ୍ରୀଜଗନ୍ନାଥଙ୍କର ବାସି ରଥଯାତ୍ରା ହେଇଯାଇଛି । ସେନ୍ତା ଜିଲ୍ଲାର ବୌଦ୍ଧ ସହରର ବୁଟୁପାଲି, ପାତାଳି ଶ୍ରୀକ୍ଷେତ୍ର, ନାୟକପଡ଼ା ଗୁମ୍ଫା, ବୌଦ୍ଧ ବୁକ୍‌ର ନାରାୟଣନଗର, ସାହାଜପାଲ, ବାଉଁଶଶିଖର ନ ଭିଲ୍ ରଥଯାତ୍ରା ହେଉଛି । ରାଜାରାଜୁଡ଼ା ଅମଲ୍‌ନୁ ଜିଲ୍ଲାର ବହୁତଟେ ଜାଗା ନ ତୃତୀୟା ତିଥି ଶ୍ରୀଜଗନ୍ନାଥଙ୍କର ବାସି ରଥଯାତ୍ରା ହେଇଆସୁଛି ।

ପାଣିପାଗ ଆରବନ୍ଧୁ / ସମ୍ବଲପୁର

ସାରା ରାଏଜେ ଏକ୍ସେନ୍ ଦକ୍ଷିଣ ପଶ୍ଚିମ ମୌସୁମୀ ବାୟୁ ସକ୍ରିୟ ରହିଛି । ଇତାର ପ୍ରଭାବ୍ଥୁ ରାଜ୍ୟର ଭିନ୍ ଭିନ୍ ଇଲାକା ନ ବର୍ଷା ହେଉଛି । ଆଏବା ୨୪ ଘଂଟା ଭିତ୍ରେ ଦକ୍ଷିଣ ଓଡ଼ିଶାର ବହୁତଟେ ଜାଗା ନ ଘଡ଼ଘଡ଼ି ସାଙ୍ଗେ ବର୍ଷା ହେବାର ସମ୍ଭାବନା ରହିଛି । ସେନ୍ତା ଉତ୍ତର ଓଡ଼ିଶାର କେତେଟା ଜାଗା ନ ଭିଲ୍ ବର୍ଷା ହେଇପାରେ ବଲି ଆଂଚଲିକ୍ ପାଣିପାଗ୍ ବିଜ୍ଞାନ କେନ୍ଦ୍ର ତରଫୁ ସୂଚନା ମିଳିଛି ।